



14. juni 2012

Inatsisartut Suleriaasianni § 37 naapertorlugu Naalakkersuisunut apeqqut imaattoq matumuuna saqqummiuppara:

**Naalakkersuisunut apeqqut § 3 pillugu Namminersorlutik Oqartussat nalunaarutaat nr. 4, 4. marts 2011-meersut tunngatillugu apeqqut, Kommuneqarfik Sermersuumi imigassanik aalakoornartortalinnik nioqquteqartarneq sassaallertarnerlu pillugit, tassani junip ulluisa aallaqqaataani illoqarfiit nunaqarfiillu ilaanni imigassamik nioqquteqartarneq sassaallertarnerlu inerteqqutigineqalerput.**

- 1. Sunarpiaq pissutaava, Tasiilami ataanilu taaneqartuni nunaqarfinni junip ulluisa aallaqqaataani immiaararsisinnaannginnermut?**
- 2. Naalakkersuisut isumaqarpat ukiup ulluisa 365-t ilaanni ullormi ataasinguami immiaaqqanik nioqquteqarnissamut inerteqquteqarneq pinaveersaartitsinnermut arlaatigut iluaquteqartoq imaluunniit pineqaannarpa kaajallannerinnarmi nassaaq tusaqqusaarutigalugu politikki?**
- 3. Suna pissutaava inerteqqut taamaallaat Tasiilamut nunaqarfiinullu tallimanut atuummat?**
- 4. Naalakkersuisut qanoq iliorniarpat junip ulluisa aallaqqaataani immiaararseqqusaannginnerup arlaatigut pinaveersaartitsinera paasiniarlugu?**
- 5. Kommuneqarfik Sermersuumi imigassanik aalakoornartortalinnik nioqquteqartarneq sassaallertarnerlu pillugit Namminersorlutik Oqartussat nalunaarutaat nr. 4, 4. marts 2011-meersoq allanngortinniarlugu Naalakkersuisut pilersaaruteqarpat, ukiup ulluisa 365-iusut ilaanni ullormi ataatsimi immiaararsinissamut inerteqquneqarneq isumaqanngitsoq atorunnaarsinniarlugu?**

(Inatsisartunut ilaasortaq Justus Hansen, Demokraatit)



**Tungavilersuut:**

Tasiilami nunaqarfinnilu Kulusummi, Tiniteqilaami, Sermiligaami, Kuummiuni aamma Isortumi imigassanik 2,25 sinnerlugu aalakoornartortalinnik inoqquteqarneq sassaallertarnerlu inerteqqutigineqalerpoq ukiut tamaasa junip ulluisa aallaqqaataani. Allatut oqaatigalugu tassa imaappoq, sumiiffinni pineqartuni najugaqartut ullormi tassanerpiaq immiaararsisinnaanngillat.

Demokraatini isumaqarpugut, pisariaqarluinnartoq nunami maani innuttaasut assigiimmik pineqarnissaat. Kalaallit amerlanersaat imigassamik torersumik atuisarput – apeqqutaanani Avannaamiuuneq, Kujataamiuuneq, Tunumiuneq imaluunniit Kitaamiuuneq. Taamaattumik pissusissamisuunngilaq immikkoortitsineq.

Kommuneqarfik Sermersuumi imigassanik aalakoornartortalinnik nioqquteqartarneq sassaallertarnerlu pillugit Namminersorlutik Oqartussat nalunaarutaat nr. 4, 4. marts 2011-meersumi taamaallaat pineqarpoq innuttaasunik immikkoortitsinissaq. Qularilluinnuqqissaarpara ilisimatuussutsikkut uppersarneqarsinnaasoq, ukiup ulluisa ilaanni ataasinnguami immiaararsinissamut inerteqquneqarneq pinaveersaartitsinikkut ilumut sunniuteqarnersoq.

Taarsiullugu inuit imigassamik ajornartorsiutillit ikiorniartariaqaraluarpagut aamma sulissutigisariaqaraluarparput meeqqat inuusuttullu torersumik imigassartortalernissaat imigassamullu isiginnilernissaat anguniarlugu perorsarnissaat. Naalakkersuisut isumaqarpata tamanna anguniagaq anguneqarsinnaasoq sumiiffinni aalajangersimasuni ukiup ingerlanerani ullormi ataatsimi immiaararsinissamut inerteqquteqartarnikkut, taava tupigusulaanngitsoorsinnaanngilanga.

Apeqqutit akeqquneqarput piffissarititaasut ullut sulliviit naliginnaat qulit iluanni.